

Kalaallit Nunaanni sulisilluni ajoqusersinnaanermut sillimmasiisarneq pillugu inatsit malillugu napparsimasut katsorsarneqarnerannut atortutigullu ikiorsiissutinut aningaasartuutit akilerneqarnissaat pillugit nalunaarut

Inatsimmut nalunaarut nr. 75, 16. januar 2017-imeersoq malillugu Kalaallit Nunaanni sulitilluni ajoqusersinnaanermut isumannaarineq pillugu sillimmasiisarneq pillugu inatsimmi § 14, imm. 6-p aamma 7-ip malitsigisaannik aalajangersarneqarpoq:

Isumasiuutit

§ 1. Nalunaarummi matumani tulliuuttut ima paasineqassapput:

- 1) »Sulisilluni Ajoqusernerit pillugit Sullissivik«: Arbejdsmarkedets Erhvervssikring-p Kalaallit Nunaanni immikkoortortaarfia.
- 2) »Ajoquserneq nalunaarutigineqarsimasooq«: ajoquserneq sulisitsisup isumannaarinninnissamut pisussaataasup sulisilluni ajutoornermut sillimmasiisarfanut, matumani inatsimmi § 52, imm. 5 malillugu ingerlatsiviit imminnut sillimmasiisartut ilanngullugit, imaluunniit Sulisilluni Ajoqusernerit pillugit Sullissivimmut nalunaarutigineqarsimasooq.
- 3) »Katsorsarneqarneq«: nakorsaatit aamma nakorsartinnermut tunngasut suugaluartulluunniit, matumani inatsimmi § 5 malillugu sulisilluni ajoqusernerup kingorna sungiusarnerit pisariaqartinneqalersut ilanngullugit.
- 4) »Atortutigut ikiorsiissutit«: Atortutigut ikiorsiissutit suugaluartulluunniit, matumani inatsimmi § 5 malillugu sulisilluni ajoqusernerup kingorna timip ilaanut taarsiussat pisariaqartinneqalersut ilanngullugit.
- 5) »Suliaq suliarineqarpoq«: Sulinermi ajoqusernermut sillimmasiisarfimmi, matumani inatsimmi § 52, imm. 5 malillugu ingerlatsiviit imminnut sillimmasiisartut ilanngullugit, imaluunniit inatsimmi § 15 malillugu Sulisilluni Ajoqusernerit pillugit Sullissivimmi taarsiivigitinnissaq pillugu ataatsimut aalajangiinissap tungaanut suliaq suliarineqarnera. Ankestyrelsimit aalajangiinerup naammagittaalliuutigineqartup utertillugu suliareqqitassanngortinneqarnerani, Sulisilluni Ajoqusernerit pillugit Sullissiviup taarsiivigitinnissaq il.il. pillugit nutaamik aalajangiinissaata tungaanut, suliaq suliarineqartutut isigineqassaaq. Inatsimmi § 47 malillugu katsorsarneqarnermut atortutigullu ikiorsiissutinut aningaasartuutit akilerneqarnissaat pillugit apeqqut suliaralugu aallarteqqinneqarpat, aallartitseqqinnissamik noqqaassuteqarnermiit imaluunniit Sulisilluni Ajoqusernerit pillugit Sullissiviup suliamik aallartitseqqinneq pillugu nalunaaruteqarneranit aamma Sulisilluni Ajoqusernerit pillugit Sullissiviup nutaamik aalajangiinissaata tungaanut, suliaq suliarineqartutut isigineqassaaq, taamaattoq § 7, imm. 2 takuuk. Inatsimmi § 14 malillugu aningaasartuutit akilerneqarnissaat siunertaralugu, suliami siusinnerusukkut aalajangiinermut atatillugu Sulisilluni Ajoqusernerit pillugit Sullissiviup suliaq aallarteqqinniarlugu aalajangersimappat, Sulisilluni Ajoqusernerit pillugit Sullissiviup suliaq aallarteqqinneqarfiatut ullormit aalajangigaanit, aamma Sulisilluni Ajoqusernerit pillugit Sullissiviup nutaamik

aalajangiinissaata tungaanut, suliaq suliarineqartutut isigineqassaaq.

6) »Piffissamut killilikkamut siunissami katsorsarneqarnermut atortutigullu ikiorsiissutininut aningaasartuutit«: Katsorsarneqarnermut aningaasartuutit il.il., piffissap killilikkap iluani naammassineqarsimasussatut naatsorsuutigineqartut, aamma atortutigut ikiorsiissutininut aningaasartuutit, ajoqusersimasup piffissami killilikkami pisariaqartitaatut naatsorsuutigineqartut.

7) »Siunissami katsorsartinnermut atortutigullu ikiorsiissutininut aningaasartuutit atajuartut«: Katsorsarneqarnermut il.il. aningaasartuutit, atajuartussatut naatsorsuutigineqartut, aamma atortutigut ikiorsiissutininut aningaasartuutit, ajoqusersimasup ataavartumik pisariaqartitaatut naatsorsuutigineqartut.

Katsorsarneqarnermut atortutigullu ikiorsiissutininut aningaasartuutit

§ 2. Ajoqusersimasup katsorsarneqarneranut atatillugu aningaasartuutit, matumani sungiusarneqarnerani aningaasartuutit ilanngullugit, aamma atortutigut ikiorsiissutit pissarsiarineqarnerannut iluarsaanneqarnerannulluunniit aningaasartuutit, matumani timip ilaanut taarsiussat isarussallu ilanngullugit, nalunaarummi matumani malittarisassat malillugit akilerneqassapput.

Imm. 2. Inunnut Kalaallit Nunaanni napparsimalersinnaanermut sillimmaserneqarsimasunut naleqqiullugu inunnut Kalaallit Nunaanni napparsimalersinnaanermut sillimmaserneqarsimanngitsunut napparsimanermi katsorsarneqarnermut sungiusarneqarnermullu aningaasartuutininut annertunerusunik taartisiaqartitsisoqarsinnaanngilaq.

§ 3. Katsorsarneqarnermut atortutigullu ikiorsiissutininut aningaasartuutit, ajoqusernerup nalunaarutigineqannginnerani piffissamut tungassuteqartut, § 4-mi piumasaqaatit naammassineqarsimappata akilerneqarsinnaapput.

§ 4. Katsorsarneqarneq sulisilluni ajoqusernerup malitsigippagu aamma sapinngisamik ajunnginnerpaamik peqqissiartornissamut pisariaqartutut naatsorsuutigineqarpat, katsorsarneqarnermut aningaasartuutit akilerneqarsinnaapput. Pisortat peqqissuunissamut imaluunniit napparsimalernissamut pitsaaliuinnermik suliniutaat pillugit malittarisassat atuuttut malillugit imaluunniit isumaginninnermi ikiorsiissutininut imaluunniit pisortat napparsimaviini katsorsarneqarnermut atatillugu, katsorsarneqarnermut aningaasartuutit akilerneqarsinnaannginnginnerat piumasaqaataavoq, taamaattoq imm. 4 takuuk.

Imm. 2. Taakku napparsimanermi katsorsarneqarnerup imaluunniit sungiusarteqqinneqarnerup inernerisa qulakkeerneqarnissaanut, sulisilluni ajoqusernerup malitsigisaasa annikillisinneqarnissaanut imaluunniit inuussutissarsiorsinnaassutsimik annaasaqarnerup annertussusaata aamma ataavartumik ajoquteqalernerup annertussusaata erseqqinnerusumik aalajangerneqarnissaanut pisariaqartinneqarpata, timip ilaanut taarsiussanut, isarussanut, tusartaatinut, issiavinnut kaassuartaqqanut aamma atortutigut ikiorsiissutininut allanut il.il. aningaasartuutit akilerneqarsinnaapput. Pisortat peqqissuunissamut imaluunniit napparsimalernissamut pitsaaliuinnermik suliniutaat pillugit malittarisassat atuuttut malillugit imaluunniit isumaginninnermi ikiorsiissutininut imaluunniit pisortat napparsimaviini

katsorsarneqarnermut atatillugu, katsorsarneqarnermut aningaasartuutit akilerneqarsinnaannginnerat piumasaqaataavoq.

Imm. 3. Sulinerup malitsigisaanik imaluunniit pissutsit sulinerup taassuma suliarineqarneranut atatillugu atortoq ikiorsiissut il.il. ajoqusersimappat imaluunniit aserorsimappat, § 1, nr. 4 malillugu atortutigut ikiorsiissutip iluarsanneqarnerani imaluunniit nutarterneqarnerani aningaasartuutaasut akilerneqarsinnaapput. Isarussat sinaakkutaannut oqaaseqatigiit siulliit aamma atuupput, taakku akigititap annerpaaffianik, ukiukkaartumik naleqqussarneqartartumik, nalinginnaasumik taarsiivigineqartarput.

Imm. 4. Napparsimavimmi naalagaaffiup piginngisaani aamma Kalaallit Nunaanni imaluunniit Danmarkimi passutitittarfimmi naalagaaffiup piginngisaani napparsimanerup katsorsarneqarneranut imaluunniit sungiusarneqarnermut aningaasartuutit, pisortanit tapiissutaasinnaasut ilanngaatalugit, suliap suliarineqarnerani akilerneqarsinnaapput. Oqaaseqatigiinni siullerni akiliussineq, ullormusiat ataatsimoortinneqarneranni sipaarutit angeqqataasa aamma taarsiissuteqarnermi aningaasartuutinit allat, ajoqusersimasup pisortat napparsimaviini imaluunniit passutittarfiini katsorsarneqarnissap utaqinnginnissaanut sipaarutissatut naatsorsuutigineqartut anguneqarsinnaasutut naatsorsuutigineqartut assigissagaat piumasaqaataavoq.

§ 5. § 4-mi piumasaqaatit naammassineqarsimappata, § 2, nr. 6 aamma 7 malillugit siunissami katsorsarneqarnermut atortutigullu ikiorsiissutinut aningaasartuutit akilerneqarsinnaapput.

Katsorsarneqarnermut atortutigullu ikiorsiissutinut aningaasartuutit akilerneqarnissaat pillugit Sulisilluni Ajoqusernerit pillugit Sullissiviup aalajangiinera

§ 6. Inatsimmi § 15 malillugu aalajangiineq apeqqutaatinnagu, §§ 3-imiit 5 ilanngullugu malillugit Sulisilluni Ajoqusernerit pillugit Sullissivik aalajangiisnaavoq.

Imm. 2. Katsorsaasumut imaluunniit atortutigut ikiorsiissummik pisiffigisamut imaluunniit ajoqusersimasumut, taanna katsorsaasumut imaluunniit pisiffigisamut akiliisimappat, akiliineq toqqaanaq pisinnaavoq. Akiligassat allagartaat malillugu akiliisoqassaaq aamma tamanna ingerlaavartumik pisinnaavoq.

Imm. 3. Imm. 4-miit 6 ilanngullugu malillugit, § 5 malillugu aningaasartuutit ajoqusersimasumut tamaasa ataatsikkut tigusassanngorlugit akilerneqassapput.

Imm. 4. § 2, nr. 6 malillugu piffissami killilikkami katsorsarneqarnermut imaluunniit atortutigut ikiorsiissutinut aningaasartuuteqarnermi, aningaasartuutit tamaasa ataatsikkut akilerneqartut tassaapput ukiumoortumik imaluunniit qaammammoortumik agguaqatigiissillugu aningaasartuutit ukiut qaammatilluunniit, katsorsarneqarnerup sivisussusissaattut naatsorsuutigineqartut amerlassusaannut amerlisarneqarnerat.

Imm. 5. § 2, nr. 7 malillugu siunissami ataavartumik katsorsarneqarnermut imaluunniit atortutigut ikiorsiissutinut aningasartuuteqarnermi, tamaat ataatsikkut tigusassat tassaapput ukiumoortumik agguaqatigiissillugu taartisiassaq, piffissami aalajangiiffiusumi naatsorsorneqartoq, inatsimmi § 31, imm. 4 malillugu, matumuuna inatsimmi inuussutissarsiorsinnaassutsimik annaasaqarnermi § 14, imm. 3 malillugu, aningaasaatit amerlisarneqarnerannut kisitsimmik aalajangersarneqartoq.

Imm. 6. Imm. 4 malillugu siunissami katsorsarneqarnermut aningaasartuutit amerlassusaasa imm. 5 malillugu siunissami katsorsartinnermut aningaasartuutit qaangissanngilaat. Taamaattoq katsorsaasumit imaluunniit atortutigut ikiorsiissummik pisiffigisamit katsorsarneqarnissamut eqqorluartumik missiliuummik naatsorsukkat pigineqarpata, tamanna atuutissanngilaq.

Suliareqqitassanngortitsineq

§ 7. Inatsimmi § 47 malillugu sulianut suliareqqitassanngortinneqarsimasunut, §§ 3-miit 6 ilanngullugu taamatuttaaq atorpeqassapput.

Imm. 2. Suliani suliareqqinneqartuni, nalunaarummi matumani § 6, imm. 5-imiit 6 ilanngullugu malillugit inatsimmi § 14, imm. 3 malillugu Sulisilluni Ajoqusernerit pillugit Sullissivik aalajangiissaaq.

Atuutilerfissaa

§ 8. Nalunaarut ulloq 1. Juli 2024 atuutilissaaq. *Imm. 2.* Nalunaarut malillugu aalajangiinernut, ullormi atuutilerfiani kingusinnerusukkulluunniit aalajangiinerni atorpeqassalluni.

Imm. 3. Kalaallit Nunaanni sulisilluni ajoqusersinnaanermut isumannaarineq pillugu inatsit malillugu napparsimasunik katsorsaanermut atortutigullu ikiorsiissutinut aningaasartuutit akilerneqartarnerat pillugu nalunaarut nr.1658, 21. december 2010-imeersoq atorunnaarsinneqassaaq.

Beskæftigelsesministereqarfik, ulloq

Atsiortoq 1

Atsiortoq 2